

VENDIM
Nr.704, datë 16.11.2005

PËR MIRATIMIN E KRITEREVE TË PËRFAQËSIMIT, TË PËRZGJEDHJES, EMËRIMIT E SHKARKIMIT TË ANËTARËVE DHE RREGULLAT E FUNKSIONIMIT TË KËSHILLIT TË STATISTIKAVE

Në mbështetje të nenit 100 të Kushtetutës dhe të nenit 10 të ligjit nr.9180, datë 5.2.2004 "Për statistikat zyrtare", me propozimin e zëvendëskryeministrit, Këshilli i Ministrave

VENDOSI:

Kriteret e përfaqësimit, të përzgjedhjes, emërimit e shkarkimit dhe rregullat e funksionimit të Këshillit të Statistikave, i cili përbëhet nga 11 anëtarë, janë:

1. Përbërja e Këshillit të Statistikave:

Këshilli i Statistikave përbëhet nga 11 anëtarë, me përfaqësim si vijon:

- | | |
|--------------------------|------------|
| - Bota akademike | 3 anëtarë; |
| - Shoqëria civile | 3 anëtarë; |
| - Agjencitë statistikore | 5 anëtarë. |

2. Bota akademike

a) Bota akademike përfaqësohet me 3 anëtarë, të cilët përzgjidhen në mënyrë të drejtpërdrejtë nga radhët e personelit të brendshëm të trupit akademik të Universitetit të Tiranës.

Kandidaturat nga bota akademike duhet të plotësojnë këto kriteret për t'u përzgjedhur si anëtarë:

- të gëzojnë reputacion të lartë profesional;
- të japin kontribut të drejtpërdrejtë në mësimdhënien e statistikës ose të kryejnë apo zbatojnë studime me të dhënat e ofruara nga kjo shkencë;
- të zotërojnë tituj shkencorë.

b) Rektori i Universitetit i paraqet Kryeministrit, sipas kërkesës së tij, listën e kandidaturave të cilat plotësojnë kriteret për t'u përzgjedhur në këtë funksion. Kandidaturat përzgjidhen nga Kryeministri, kryesisht nga radhët e përfaqësuesve të botës akademike të Fakultetit të Ekonomisë e të Fakultetit të Shkencave të Natyrës, Universiteti i Tiranës. Këshilli i Ministrave, me propozim të Kryeministrit, emëron ose e liron nga funksioni anëtarin, për shkak të përfundimit të detyrës së tij në institucion. Në çdo rast, anëtari i përzgjedhur nga bota akademike nuk mund të qëndrojë në këtë funksion për një mandat më të gjatë se 7 vjet, me të drejtë riemërimi vetëm 1 herë.

3. Shoqëria civile

a) Shoqëria civile përfaqësohet me 3 anëtarë të zgjedhur nga radhët e organizatave jofitimprurëse me reputacion, përvojë profesionale dhe njerëzore, të cilët gjatë misionit të organizatës përdorin ose kryejnë studime në shkencën e statistikës, si dhe kanë njohje të mira për gjendjen shoqërore e demografike të vendit. Njëri nga 3 anëtarët e përzgjedhur nga radhët e shoqërisë civile duhet të përfaqësojë një bashkim gazetarësh profesionistë.

Çdo agjenci statistikore depoziton pranë Kryeministrit, me kërkesë të vet, brenda 10 ditësh, listën e organizatave jofitimprurëse vendase, të cilat bashkëveprojnë me agjencinë ose përdorin statistika zyrtare të ofruara prej saj.

b) Kryeministri përzgjedh nga listat e paraqitura 3 anëtarë të shoqërisë civile dhe ia propozon Këshillit të Ministrave për miratim, në mbledhjen e radhës.

c) Përfaqësuesi i organizatës qëndron në funksion për një mandat 3-vjeçar, pa të drejtë rizgjedhjeje.

Kur përfaqësuesi i organizatës humbet të drejtën për të përfaqësuar organizatën e tij, Kryeministri, kryesisht ose me kërkesë të vetë organizatës, mund t'i paraqesë Këshillit të Ministrave propozimin për lirim nga funksioni të anëtarit përfaqësues të përzgjedhur.

ç) Përfaqësuesi i shoqërisë civile, gjatë pjesëmarrjes në këshill, ka për detyrë të ruajë konfidencialitetin e të dhënave dhe të informacionit që siguron, si dhe të mos i përdorë ato në organizatën që përfaqëson, përveç rastit kur të dhënat mund të sigurohen, njëkohësisht, edhe nga burime të tjera publike.

Ky detyrim angazhon përfaqësuesin e shoqërisë civile në këshill me përgjegjësinë për të mos kryer konkurrencë të pandershme në dëm të organizatave të tjera jofitimprurëse ose për të përfituar pa të drejtë

për shkak të pjesëmarrjes në Këshillin e Statistikave.

d) Çdo organizatë jofitimprurëse, që vëren se përfaqësuesi i shoqërisë civile, i përzgjedhur si anëtar në këtë këshill, shkel këtë parim dhe kryen veprimtari në kundërshtim me shkronjën “ç” të pikës 3 të këtij vendimi, ka të drejtë t’i drejtohet Këshillit të Statistikave, me kërkesë për shkarkimin nga mandati. Këshilli i Statistikave shqyrton çështjen dhe në bazë të fakteve dhe rrethanave të paraqitura shprehet me vendim.

e) Një kopje e qëndrimit të Këshillit të Statistikave, e shoqëruar me qëndrimin me shkrim të anëtarit të proceduar për këtë çështje, i njoftohet Kryeministrit, si dhe i dërgohet, brenda 5 ditëve, organizatës që kërkoi fillimin e këtij procedimi.

4. Agjencitë statistikore:

a) Përfaqësohen nga 5 anëtarë, përfaqësues të institucioneve qendrore si më poshtë vijon:

- | | |
|------------------------------------|-----------|
| - Banka e Shqipërisë | 1 anëtar; |
| - Ministria e Arsimit dhe Shkencës | 1 anëtar; |
| - Ministria e Brendshme | 1 anëtar; |
| - Ministria e Financave | 1 anëtar; |
| - Ministria e Integritetit | 1 anëtar; |

b) Titullari i institucionit, i paraqet Këshillit të Ministrave propozimin, për përfaqësuesin e tij të përhershëm në Këshillin e Statistikave.

c) Këshilli i Ministrave miraton emërimin, lirimimin ose shkarkimin nga ky funksion të përfaqësuesit, sipas kërkesës së titullarit të çdo institucioni.

ç) Kriteret e përzgjedhjes për përfaqësuesit e agjencive statistikore:

Titullari i institucionit propozon përfaqësuesin për anëtar në këshill, nga rrethi i personave të institucionit, që kanë kualifikime në fushën ekonomike ose atë humane, janë personalitete të spikatura në rrethin e tyre profesional, si dhe kanë përvoja të mëparshme në fushën e statistikës, në atë ekonomike, shoqërore ose mjedisore.

5. Kohëzgjatja e mandatit të përfaqësuesit nga rrethi i agjencive statistikore:

a) Anëtari i Këshillit të Statistikave e kryen këtë funksion deri në ditën e lirimimit ose të shkarkimit të tij. Lirimi ose shkarkimi nga funksioni kryhet kur mbaron ose përfundon marrëdhënia me institucionin ose kur titullari i institucionit propozues i kërkon Këshillit të Ministrave zëvendësimin e tij, pavarësisht nga motivi.

b) Kur zhvillohen mbledhje nga Këshilli i Statistikave, gjatë periudhës që agjencia statistikore kërkon lirimimin ose shkarkimin nga funksioni të përfaqësuesit të tij, përfaqësuesi i propozuar për t’u liruar ose shkarkuar, humbet të drejtën për të votuar, për çështjet në shqyrtim. Ai mund të votojë dhe të fitojë të drejtën për të votuar, vetëm nëse agjencia që ai përfaqëson, njofton me shkrim këshillin dhe pajis përfaqësuesin me autorizim për të votuar për çështjet objekt shqyrtimi në mbledhje.

6. Dokumentacioni dhe përgjegjësia për zgjedhje e anëtarit përfaqësues të agjencisë statistikore.

a) Titullari i institucionit shoqëron propozimin për anëtar me relacionin shpjegues, si dhe me dokumente shoqëruese për plotësimin e kriterëve të përcaktuara për kandidatët;

b) Këshilli i Ministrave miraton kandidatin e propozuar për anëtar, i cili përmbush kriteret për t’u zgjedhur.

7. Mënyra dhe afati i plotësimit të vendit bosh të anëtarit përfaqësues të agjencisë statistikore:

a) Titullari i institucionit shtetëror i paraqet Këshillit të Ministrave propozimin për kandidatin e ri, brenda periudhës 10-ditore nga marrja në dijeni ose konstatimi i faktit, për mbetjen e vendit bosh në këshill.

b) Këshilli i Ministrave shqyrton propozimin e paraqitur dhe merr vendimin në mbledhjen më të parë të radhës.

8. Këshilli i Statistikave, gjatë ushtrimit të funksionit të vet udhëhiqet nga qëllimi i rritjes së cilësisë së statistikave zyrtare dhe i ruajtjes së besimit të publikut në punën e Institutit të Statistikave.

9. Organet drejtuese të Këshillit të Statistikave janë:

i) kryetari;

ii) zëvendëskryetari.

Kryetari dhe zëvendëskryetari zgjidhen nga anëtarët e Këshillit të Statistikave.

Kryetari përfaqëson Këshillin e Statistikave në marrëdhënie me të tretët për vendimet që merr këshilli.

10. Mbledhja e Këshillit të Statistikave

a) Këshilli i Statistikave mbledhet në seancë të zakonshme të paktën 4 herë në vit. Ai thirret nga kryetari dhe mbledhjet janë të vlefshme kur paraqiten të paktën 6 anëtarë të këshillit.

Këshilli mbledhet në seanca të jashtëzakonshme kur kjo kërkohet të paktën nga 1/3 e anëtarëve.

b) Anëtarët njoftohen me shkrim për datën, orën dhe vendin ku do të zhvillohet mbledhja, si dhe për rendin e ditës, që do të shqyrtohet në mbledhje. Si rregull, njoftimi bëhet të paktën 10 ditë përpara datës së mbledhjes. Për çështje urgjente kryetari i këshillit mund të thërrasë mbledhjen, duke mos respektuar afatet e mësipërme, por, detyrimisht, me një njoftim me shkrim.

c) Drejtori i Përgjithshëm i INSTAT-it merr pjesë në mbledhje, pa të drejtë vote.

11. Vendimet e Këshillit të Statistikave merren me shumicë të thjeshtë të anëtarëve të pranishëm. Në rast barazimi të votave, pro dhe kundër, projektvendimi vlerësohet i rrëzuar.

12. Detyrat dhe përgjegjësitë e anëtarëve përfaqësues të agjencive statistikore:

a) Anëtarët, përfaqësues të agjencive statistikore, në ushtrim të përgjegjësiave konkrete, njoftojnë institucionet e tyre, brenda afatit 10-ditor nga miratimi i programit vjetor ose planveprimit të INSTAT-it, për detyra, përgjegjësi ose angazhime që institucionit do t'i lindin për përgatitjen e dokumentacionit të nevojshëm, për qëllim të veprimtarisë së INSTAT-it.

b) Anëtari, përfaqësues i agjencisë statistikore, në këshill bashkërendon veprimet që institucioni i përfaqësuar prej tij të përgatisë planveprimin e brendshëm për këto çështje brenda 10 ditësh.

13. Sekretariati:

a) Shërbimi i sekretariatit sigurohet nga INSTAT-i nën mbikëqyrjen e një anëtari të Këshillit të Statistikave. Detyrat e sekretariatit caktohen me vendim të veçantë të këshillit.

b) Këshilli i Statistikave cakton një anëtar me detyrën për mbikëqyrjen e punës së Sekretariatit. Detyrat konkrete dhe rregullime të tjera, të nevojshme për ushtrimin e përgjegjësiave konkrete, vendosen nga Këshilli i Statistikave me vendim të veçantë.

14. Vendimi nr.501, datë 30.6.2005 i Këshillit të Ministrave “Për kriteret e përfaqësimit, të përzgjedhjes, emërimit, shkarkimit dhe funksionimit të Këshillit të Statistikave”, si dhe çdo akt tjetër nënligjor i dalë në mbështetje të tij, shfuqizohet, dhe vendimi nr.551, datë 3.8.2005 i Këshillit të Ministrave “Për caktimin e anëtarëve të Këshillit të Statistikave” shfuqizohet.

15. Këshilli i Statistikave mbledhet brenda 1 muaji nga konstituimi i mandateve të anëtarëve të tij. Mbledhja thirret sipas kërkesës së çdo institucioni anëtar.

16. Ngarkohen institucionet përgjegjëse që, brenda 5 ditësh nga hyrja në fuqi e vendimit, të paraqesin pranë Këshillit të Ministrave propozimet përkatëse për anëtarë të Këshillit të Statistikave.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha